

DRUGI UGAO PRIČE O NAPLATI DUGOVA ZA GRIJANJE

Sarajevska Toplana bi brže riješila sporove od općinskih sudova!?

Potražuju 57,5 miliona • Oko 1.800 korisnika koji su pojedinačno dužni više od 5.000 KM

Od 1996. godine kada je stavljen u funkciju sistem centralnog grijanja u Sarajevskom kantonu pa do danas dugovanja građana komunalnom preduzeću "Toplane" iznose 53 miliona KM, dok kod poslovnih lica iznosi 4.500.000 KM. Općinskom sudu u Sarajevu ovo preduzeće je podnijelo 172.180 tužbi, od toga 167.953 protiv fizičkih lica i 4.227 protiv pravnih lica za neisplaćena dugovanja o isporučenoj toplotnoj energiji. Od ovog broja tužbi, 57.234 je riješeno i obustavljeno dok je aktivnih koji se rješavaju na sudu 114.946.

Dvaput godišnje

Prema riječima Asime Granulo, direktora Sektora ekonomskih poslova, periodi utuženja fizičkih lica se vrše dva puta godišnje i to za period januar-juli i august-decembar.

Sad su otišle tužbe za januar-juli ove godine, međutim pitanje je kada će se one razriješiti jer to sve na sudu ide jako sporo. Inače imamo problema sa sudom jer

nemaju dovoljno kapaciteta, a veliki broj tužbi se dostavlja tako da sve to usporava cijeli proces. To nije korektno s njihove strane, a nama bi se trebala dati mogućnost naplate tužbe-kaže Granulo.

Ona ističe kako su najkritičnija područja što se tiče naplativosti stambenih jedinica u općinama Ilidža, Ilijaš i Hadžići, dok je Općina Centar i Stari Grad dosta dobra.

- Imamo oko 1.800 korisnika koji su pojedinačno dužni više od 5.000 KM. Redovnih platiša imamo 30.000 od 47.000 korisnika dok je 1.400 koji nikada ništa nisu uplatili od 1996. godine pa do danas te njihov dug iznosi 5.500.000 KM. Polovina njih su stalni korisnici stambenih jedinica, međutim očigledno da ti ljudi nemaju razvijenu svijest o obavezni plaćanja grijanja koje su sami oni utrošili. Stalno opominjemo dužnike i neredovne platiše, pozivamo ih da se dogovorimo oko isplate pa im čak nudimo i mogućnost da svoj dug ot-



Toplane: Ogorčeni na spore sudove

plate i na rate međutim sama ova cifra govori koliko su ljudi zainteresovani da riješe problem.

Nema izolacije

Nemamo zakonsku potporu da možemo isključivati dužnike sa sistema centralnog grijanja, a i jako je teško izvodivo u stambenim jedinicama isključiti i izolovati samo jedan stan- navodi Granulo.

Najveći problem što se tiče institucija koje duguju za isporučenu energiju, prema njenim riječima, predstavljaju općinski poslovni prostori koji daju svoje prostorijske u zakup i samim tim dužni su da se uklju-

če u sistem naplate potrošene energije.

-Općine neće da potpišu ugovore o isporuci toplotne energije za Toplane, a oni ugovorom obavezuju zakupce da plaćaju komunalije, međutim mnogi te obaveze ne izmiruju te se dugovi gomilaju. Kada nemate ugovora sve je teže i tu nastaje spor- kaže Granulo.

Ona ističe da problem predstavljaju i firme koje se brzo osnivaju, ali isto tako i brzo ukidaju ili mijenjaju djelatnost i prenose sjedišta ostavljajući neizmirena dugovanja, te iako imaju podatke vlasnika firme teško je izmiriti tu obavezu.

E. Alibegović